

Panalangin ng mga Kristiyano sa Maghapon
LITURGY OF THE HOURS

PANALANGIN SA TAKIPSILIM II

Ika-24 ng Setyembre, 2023
{ Ika-25 Linggo sa Karaniwang Panahon }



Tumayo at gawin ang tanda ng krus

O Diyos, halina at ako'y tulungan.

— O Panginoon, magmadali ka sa iyong pagdamay.

Papuri sa Ama, at sa Anak, at sa Espiritu Santo.

— Kapara noong una, ngayon at magpasawalang hanggan.
Amen.

AWIT

O Kristo, ikaw ang aming liwanag at araw;
Sadyang pumapalis sa gabi at kadiliman.
O araw ng Diyos na may walang hanggang sinag;
May pangako ang bukas sa dulot na liwanag.

Ngayong dumating na, anino ng takipsilim,
Sa 'yo ay dumudulog, dinggin ang panalangin.
Mapayapang gabi'y amin nawang tamasahin
Hanggang kinabukasa'y dumatal at magising.

Alalahanin kaming mga abang nilalang,
Lumalapit ngayong may taglay na kahilingan:
Ang makapiling sana ay tanging ikaw lamang,
Sapat nang gantimpalang di maaring tumbasan.

Umupo o tumayo

MGA ANTIPONA AT SALMO

Antipona 1

Palalawakin ng Panginoon ang kanyang lupain mula sa Sion; at maghahari siya magpakailanman.

Salmo 110:1-5, 7

(Ang Mesiyas, hari at pari)

Sinabi ng PANGINOON,
Sa Hari ko't PANGINOON,
“Maupo ka sa kanan ko,
Hanggang ang kaaway mo,
Ay lubos na mapasuko, pagkat iyong matatalo.”

Magmula sa dakong Sion,
Ay palalawakin niya ang lupaing iyong sakop;
“At lahat ng kaaway mo’y
Sakupin at pagharian,” gayon ang kanyang utos.

Sasamahan ka ng madla,
Kung dumating ang panahong lusubin ka ng kaaway;
Magmula sa mga bundok,
Lalabas at sasamahan ka ng mga kabataan.

Ang PANGINOON ay may pangako
Na ito’y tiyak mangyayari, ganito ang kanyang saysay:
“Katulad ni Melquisedec,
Gagawin kang saserdote, na hindi na wawakasan.”

Ang PANGINOON ay naroroong
Nakaupo sa kanan mo, at pag siya ay nagalit,
Ang lahat ng mga hari ay tiyak na malulupig.

Sa batis sa lansangan,
Itong hari ay iinom, at sisigla ang katawan;
Sa lakas na tataglayin, matatamo ang tagumpay.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Palalawakin ng Panginoon ang kanyang lupain mula sa Sion; at
maghahari siya magpakailanman.

Antipona 2

Nayanig ang kalaliman ng lupa sa harap ng kadakilaan ng iyong
mukha.

Salmo 114

(Iniligtas ang mga Israelita sa pagkaalipin ng Egipto)

Ang bayang Israel
Sa bansang Egipto’y doon inilabas,
Nang ang lahing ito
Sa bansang dayuhan ay pawang lumikas;
Magmula na noon

Ang lupaing Juda'y naging dakong banal,
At yaong Israel
Ginawa ng Diyos na sariling bayan.

Ang Dagat ng Tambo,
Nang ito'y makita, ay tumakas na rin,
Magkabilang panig
Ng ilog ng Jordan, noon ay humimpil.
Maging mga bundok,
Katulad ng tupa, ay pawang nangingig,
Pati mga burol,
Nangingig na parang tupang maliliit.

Ano ang nangyari,
At ikaw, O dagat, wala nang daluyan?
Ikaw naman, Jordan,
Bakit ang tubig mo'y hindi na dumaloy?
Kayong mga bundok,
Nanginginig kayong tupa ang kapara,
At ang mga burol;
Natakot na parang maliit na tupa?

Ikaw, O daigdig,
Ngayon ay manginig sa harap ng Diyos,
Dapat kang matakot
Sapagkat darating ang Diyos ni Jacob.
Siyang sa dalisdis
Ay nagpapabukal ng saganang tubig,
At magmula roon
Ang tubig na ito ay nagiging batis.

Papuri sa Ama, at sa Anak, at sa Espiritu Santo,
Kapara noong una, ngayon at magpasawalang hanggan. Amen.

Antipona

Nayanig ang kalaliman ng lupa sa harap ng kadakilaan ng iyong mukha.

Antipona 3

Sa iyo ang lahat ng kapangyarihan, Panginoong Diyos na walang

hanggan.

Awit: Pahayag 19:1-7

(Ang kasal ng Kordero)

Purihin ang PANGINOON!

Ang pagliligtas, ang karangalan,

At ang kapangyarihan ay tanging sa Diyos!

Matuwid at tama ang kanyang hatol!

Purihin ninyo ang ating Diyos,

Kayong lahat na mga lingkod niya,

Maging dakila at hamak,

Kayong may banal na takot sa kanya!

Purihin ang PANGINOON!

Sapagkat naghahari ang PANGINOON,

Ang ating Diyos na makapangyarihan sa lahat!

Dapat tayong magalak at magsaya.

Purihin natin ang kadakilaan niya

Dahil sa nalalapit na kasal ng Kordero.

Nakahanda na ang kasintahang babae.

Purihin ang PANGINOON.

Papuri sa Ama, at sa Anak, at sa Espiritu Santo,

Kapara noong una, ngayon at magpasawalang hanggan. Amen.

Antipona

Sa iyo ang lahat ng kapangyarihan, Panginoong Diyos na walang hanggan.

Umupo

PAGBASA NG SALITA NG DIYOS

2 Corinto 1:3-7

Purihin natin ang Diyos at Ama ng ating PANGINOONG

Hesukristo, ang mahabaging Ama at Diyos na pinagmumulan

ng lahat ng kaaliwan. Inaaliw niya tayo sa ating mga kapighatian

upang makatulong naman tayo sa mga namimighati, sa

pamamagitan ng kaaliwang tinanggap natin sa kanya. Kung gaano

karami ang tiising dinaranas namin sa pakikipag-isa kay Kristo,

gayon din ang kaaliwang tinatamo namin mula sa kanya. Kung namimighati man kami, ito'y sa ikaaaliw at ikaliligtas ninyo. Kapag inaaliw kami, kayo ma'y naaaliw rin at lumalakas upang mabata ang mga kapighatiang dinaranas ninyo, tulad namin. Kaya't matibay ang aming pag-asa para sa inyo sapagkat alam naming kahati kayo sa aming kaaliwan, kung paanong kayo'y kahati namin sa pagtitiis.

Tugunan

Ipinahahayag ng sangnilikha ang dakila mong kaluwalhatian.

- Ipinahahayag ng sangnilikha ang dakila mong kaluwalhatian.

Walang hanggang pupurihin,

- ang dakila mong kaluwalhatian.

Papuri sa Ama, at sa Anak, at sa Espiritu Santo.

- Ipinahahayag ng sangnilikha ang dakila mong kaluwalhatian.

Tumayo

PAPURING AWIT NI MARIA

Antipona

Walang makapaglilingkod nang sabay sa dalawang Panginoon; hindi ninyo mapaglilingkuran nang sabay ang Diyos at ang kayamanan.

Lukas 1:46-56

Gumawa tanda ng krus

Ang puso ko'y nagpupuri sa Panginoon,
At nagagalak ang aking espiritu dahil sa Diyos na aking tagapagligtas.

Sapagka't nilingap niya ang kanyang abang lingkod!

At mula ngayon, ako'y tatawaging mapalad ng lahat ng salinlahi,
Dahil sa mga dakilang bagay na ginawa sa akin ng

Makapangyarihan —

Banal ang kanyang pangalan!

Kinahahabagan niya ang mga may takot sa kanya,

Sa lahat ng sali't saling lahi.

Ipinakita niya ang lakas ng kanyang mga bisig,

Pinangalat niya ang mga palalo ang isipan.

Ibinagsak niya ang mga hari mula sa kanilang trono,

At itinaas ang mga nasa abang kalagayan.

Binusog niya ng mabubuting bagay ang mga nagugutom,

At pinalayas niyang wala ni anuman ang mayayaman.

Tinulungan niya ang kanyang bayang Istael,

Bilang pagtupad sa pangako niya saating mga magulang,

Kay Abraham at sa kanyang lahi, magpakailanman!

Papuri sa Ama, at sa Anak, at sa Espiritu Santo,

Kapara noong una, ngayon at magpasawalang hanggan. Amen.

Antipona

Walang makapaglilingkod nang sabay sa dalawang Panginoon;
hindi ninyo mapaglilingkuran nang sabay ang Diyos at ang
kayamanan.

PANGKALAHATANG PANALANGIN

Si Kristong Panginoon ang ating pangulo, tayo ang kanyang
kasama. Dumulog tayo sa kanya nang may kagalakan:

— Panginoon, mapasa amin ang kaharian mo.

O Kristong Manunubos, tulutan mong maging malinaw na sagisag
ng pagkakabuklod ng sangkatauhan ang iyong Simbahan,
gawin siyang mabisang sakramento na magliligtas sa lahat ng tao.

— Panginoon, mapasa amin ang kaharian mo.

Sa iyong pakikipiling, gabayan ang mga obispo, kaisa ng Santo
Papa,
pagkalooban sila ng biyaya ng pag-ibig, kapayapaan at pagkakaisa.

— Panginoon, mapasa amin ang kaharian mo.

Pagbuklurin sa iyo ang lahat ng mga Kristiyano, bilang aming banal
na Pinuno,
akayin silang ipahayag ang iyong kaharian sa pamamagitan ng
pagsaksi sa kanilang buhay.

— Panginoon, mapasa amin ang kaharian mo.

Gawaran ng kapayapaan ang sandaigdigan,
sumagana nawa ang bawat bayan sa katarungan at katiwasayan.

— Panginoon, mapasa amin ang kaharian mo.

Gawaran ang mga yumao ng kaluwalhatian ng pagkabuhay,
at makihati nawa kami sa kanilang kaligayahan.

— Panginoon, mapasa amin ang kaharian mo.

Ama Namin

Ama namin, sumasalangit Ka
Sambahin ang ngalan Mo
Mapasaamin ang kaharian Mo
Sundin ang loob Mo
Dito sa lupa, para nang sa langit.
Bigyan Mo kami ngayon ng aming kakanin sa araw araw.
At patawarin Mo kami sa aming mga sala,
Para nang pagpapatawad namin
Sa mga nagkakasala sa amin.
At huwag Mo kaming ipahintulot sa tukso,
At iadya Mo kami sa lahat ng masama.
Sapagkat Iyo ang kaharian, at kapangyarihan,
At ang kadakilaan, magpakailanman.

PANGWAKAS NA PANALANGIN

Ama naming makapangyarihan,
gabayan mo kami tulad ng paggabay mo sa sangnilikha,
ayon sa batas ng pag-ibig na iyong itinakda.
Mahalin nawa namin ang aming kapwa-tao
at marating ang kaganapan sa walang hanggang buhay
na sa ami'y inihanda mo.
Hinihiling namin ito sa pamamagitan ni Hesukristo
kasama ng Espiritu Santo magpasawalang hanggan.

— Amen.

Paghayo

Pagpalain nawa tayo ng panginoon, iligtas tayo mula sa lahat ng

kasamaan at akayin tayo sa buhay na walang hanggan.

— Amen.

PANALANGIN NG MGA KRISTIYANO SA MAGHAPON

Ang mga tekstong biblikal at mga Papuring Awit na ginamit ay halaw mula sa MAGANDANG BALITA BIBLIA. Karapatang-sipi @ 1973, Philippine Bible Society, U.N. Ave., Manila.

Ang mga titik ng mga Awit at ang mga disenyong pansining ay likha ni Padre Mar DJ Arenas.

Karapatang-sipi @ 1994, LUPON REHIYONAL UKOL SA TAGALOG SA LITURHIYA.

Archdiocesan Liturgical Commission, Manila



mobile prayers



UNITED STATES OF AMERICA
www.ebreviary.com